

Twée dowe Nött

Von Peter Riehm

„Wie noch nitt in jeder Dörp en Laden wor, wo me „Solinger Stahlwaren“ kos kopen, dor wudden die Dörper on die groote Burenhöf van de Solenger Handelsluj opgesüek. Sonnen Solinger Handelsmann oder ok „Reisender“, wie me sagg, hat ömmer en groote Utwahl an Kleingrei, wie Bestecken, klein Werk-tuch on son Krom mehr. Et wor ömmer wat Besönderes, wenn sonne Reisender kom. So ehnen broch ömmer Läwen int Dörp. So reisten in de hiesige Gegend vör Johren Wankums Welm üt Olderoj. Hej wor van Beruf Schnidder on hat früher op de Burenhöf röm on töm geschniddert. Wie dat Geschäf äwer nex rechtiges mehr opbroch — die Buren koffden meiß in de Stadt in —, dor gov hei et schniddern drahn on wudden Reisender. So kom hei dann ok es nor Wesel, on dor passierden öm dat Stöcksken: Op gut Glöck geht hei in en Laden herin, wo allerlei Klempner-saakes on lechte Schmejstöcker ütgestellt woren. Die Schell bimmelt rech laut, wie hei de Ladendör losmäk. Wie hei nou de Koffers awsätt, kömp en jongen Bengel achter de Thek herut on frög nor sinnen Begehr. Wankums Weelm stellt sich vör as Reisender van Solengen, on hei möch de Meister es sprääken.

„Ja“, säht denn jonge Mann — et wor de Lehrjong in't letzte Johr — „ek well öm ou well rupen. Mar en Deel well ek ou seggen: Hei kan schlecht hören. Wet gej, bej denn Beruf wodden son Lej gau dow. Minne Meister ös ganz dow. En rechtige dowe Nott ös dat. Nou möt gej mar laut met öm prooten, söß versteht denn ou nitt!“ „Jo“, ment Wankums Welm, „ek soll öm well so laut ahnbölken, dat hei mej gut versteht.“ De Lehrjong geht fott on hölt de Meister. En betken dürden et noch, dor kom hei dann de Laden herin.

„Gaujen Dagg“, rüpp de Mann. Donnerjoh, denk Welm, dat kann me hören, dat denn dow ös, on nit faul, bölk hei de Meister met Wendstärke 12 ahn: „Gujen Dagg!“ On dann ging et wieher. Denn Meister riep, äs wenn hej sech met ehnen üttrehn setten woll, denn op de andere Sitt van de Rhinn stohn. Welm bölkten genau so laut. Ging de Meister in hoge Tön, dann Welm ok so. Dat gow en Handeln on Duhn, henn on her, dat wor tu nett. Mor et geng de Meister bold selws an de Nerwen, dat Gebölk, on ok Wankums Welm schwetten all darbej. Medden in't Verhandeln säht de Meister halvlaut: „Bah, wat en dowe Nott!“ Däh, dor wor't passiert! Welm säht in denselven Ton: „Mens dou denn, ek wör dow? Ek hör sögar ganz gut! Wegen mej brucks dou nit so tu rupen, ös wenn dou in't Wald wärs.“ „Ja, nau“, ment de Meister ganz verdaddert, „gej hört gut? On de Lehrjong säht vör mej: Dor in de Laden steht ehnen Reisender. En Schand, dat de Kerl herömlöp, denn kann överhaup nit hüren.“ Drop säht Welm: „On vör mej het hei gesegg, gej, Meister, kös nit hören. Wegen ouen Beruf wört gej dow.“ „Ja“, lach de Meister, „dann hewwen wej ons jor schön herinleggen looten; sonne verdrähjde Jong!“ Ehr Welm denn Mann hendern kos, wor denn üt denn Laden on rüpp de Jong. Mar denn hat et vorgetröcken, gau op de Stroot tu loopen, dat öm de Meister nit kreg.

Die dowe Nött sogen sech noch Johre, bös ehnen nor denn andern avgerupen wudden. Mar stets, wenn sej sech sogen, dann geng en Schmonzeln öwer et Gesech, on dat erste „Gujen Dagg!“ kom so laut herüt, ös dat gujen Dagg wor, wie se sech bej noch för dow ahnsogen, on wor sej ömsös schandalt hadden.